

JEMATAN LAMBUNG HIBRID SEMAK UNIMAS UDAH DIPENYADI KEMARI

October 2, 2016, Sunday

The Borneo Post

Tu nyadi jematan keterubah ditu bisi lurung pejalai kaki, motosikal
// Dikarang Rengenyan Labang //



BEJADI: Fadillah enggau Masing ngetas riben kelai bejadika Jambatan Ilmu, seraya disempulang Liwan (tiga ari kiba) enggau Rubiah (enam ari kiba) enggau ke bukai.

KOTA SAMARAHAN: Jematan Lambung Hibrid keterubah di Sarawak ke digaga ba mua pintu penama kampus Universiti Malaysia Sarawak (UNIMAS) iya nya jematan lambung keterubah di negeri tu ke nyendiaka lurung pejalai kaki enggau motosikal, udah mujur dipenyadika kemari.

Menteri Kereja Raya, Dato Sri Fadillah Yusof madahka, jejantas ikonik nya ti beungkus RM4.5 juta udah berengkah dibuka sereta dikenai orang mayuh kenyau bulan Ogos tu tadi.

Jejantas nya sebengkah inisiatif perintah ngangkatka pengelikun penguna jalai alun lebih agi nembiak enggau warga UNIMAS ke diau ba kandang genturung pendiau Taman Desa Ilmu.

“Kitai bela setuju meri nama jejantas tu iya nya Jambatan Ilmu, nama nya setipak bendar enggau Kota Samarahan ti dikelala enggau Bandar Ilmu di Sarawak sereta UNIMAS nyadi tibang penemu, kelimpah ari jematan lambung tu nyadi ikonik enggau pintu gerbang ke Kota Samarahan.

“Tuju kitai ke ngaga jematan lambung tu ukai semina dikena ngangkatka pengelikun pejalai kaki enggau penunggang motosikal ke deka ngelayang jalai ke seberai, tang tu ulih ngelimat jam sereta ngemuntangka pejalai penguna (motosikal).

Iya mansutka pekara nya lebuh bejaku ba pengerami bejadika Jematan Lambung ungkup Orang Bejalai Kaki enggau Motosikal Di Pintu Masuk Kampus UNIMAS, ke diatur begulai entara Opis Menteri Kereja Raya enggau Opis Menteri Pemansang Infrastruktur enggau Perengka Pengangkut Sarawak ba Parkir Kolej Kenanga, UNIMAS ditu, kemari.

Jematan Lambung ke diberi nama Jambatan Ilmu nya udah mujur dipenyadika Fadillah enggau Sapit Kepala Menteri ti mega Menteri Pemansang Infrastruktur enggau Perengka Pengangkut Sarawak Tan Sri Datuk Amar James Jemut Masing.

Konsep jematan lambung nya ngemeratka identiti Sarawak sereta pemesai endur bejalaika kaki 1.5 meter lalu jalai endur motosikal 2.5 meter pemesai, kelimpah ari ngena sistem teknologi solar enggau lampu LED.

Ku iya, Jalai Kuching/Samarahan/Asajaya iya nya jalai ti chukup sekut maya jam nurun/pulai gawa, nya alai enggau penembu jelantas nya dikearapka ulih ngurangka penusah ba jalai alun ba kandang endur nya.

Nambahka nya enggau penembu jematan lambung nya, penguna ari Asajaya enda ibuh nyelawit ngagai jalai puntang meling Jalai Entingan laban penyauh ulih dikurangka ngagai 300 meter ari 3.2 kilometer, lalu penguna ari kampus UNIMAS ke deka ngelawa Taman Desa Ilmu mega sida enda ibuh nyelawit ngagai jalai puntang meling Jalai Datuk Muhammad Musa, ku iya.

“Aku ngarapka Jambatan Ilmu tu deka dikena enggau manah sereta enda salah kena baka aktiviti dedugau enggau ke bukai, tu dikena meri pengelantang enggau pengelikun ngagai orang bejalai kaki enggau motosikal,” ku iya.

Kelimpah ari nya Masing lebuh ke bejaku seraya bejadika jematan lambung nya ngarapka nembiak UNIMAS ulih nguna manah projek nya sereta dikearapka ulih ngangkatka pengelanchor pejalai kerita sereta pengelikun penguna jalai alun.

“Opis Kereja Raya (JKR) Malaysia udah ngaga jamatan ke meraka alai besai tu ngambika pengelikun penguna jalai raya enggau pejalai kaki ulih bejalai enggau likun sereta selamat lebuh ngelayang jalai,” ku iya.

Iya ngarapka penusah bebadi ba jalai alun ulih dikurangka ngena chara ngemeratka pengelikun diri, deriba enggau enggau defensif enggau ke bukai.

Dalam taun 2015 ku iya, Sarawak ngerikod 19,098 penusah bebadi ba jalai alun ke alai 433 kes bebadi terus nabanka nyawa. Lalu ari 433 pemati nya urung 45 peratus tauka 194 kes bekaul enggau deriba enggau penumpang motosikal.

Sama bisi datai Menteri Muda Perengka Pengangkut Sungai enggau Pengelikun Liwan Lagang, Kaban Parlimen Samarahan Rubiah Wang, Mandal Chanselor UNIMAS Prof Dato Dr Mohd Kadim Suadi enggau ke bukai.